

四庫全書

集部

欽定四庫全書

山谷集卷二十五

宋 黃庭堅 撰

題跋

跋宋仁宗皇帝賜王太尉手書

大同王侍中力戰陷沒為遼所生得遂富貴於遼庭而
能不忘藩邸舊恩念故寵數以忠信回遼主之心受金
帛之惠休兵息民功賞不淺不惟遼人稱道沙間王乃

能盡忠於兩主當時士大夫亦有微管之歎者臣恭惟
章聖皇帝以天下為度責臣子之節不一而足錄其修
睦之義恩給其孫雲而仁宗皇帝以諸子幼小不問存
沒不絕其祿賜所以能使君子盡心小人竭力者也惟
二聖好生之心不殺之武至於今天下歸心宗廟之靈
當福萬代不但卜年八百又過其歷而已元符三年十
一月丁亥故史官臣黃庭堅謹記

題太公丹書後

丹書詞

敬勝怠者吉怠勝敬者滅義勝欲者從欲勝義者凶凡事不强則枉弗敬則不正枉者滅廢敬者萬世

席四端銘

安樂必敬無行可悔一反一側亦不可以忘殷監不遠視爾所代

几銘

皇皇惟敬口口生敬口口生咥口戕口

鑑銘

見爾前慮爾後

盤銘

與其溺於人也寧溺於淵溺於淵猶可游也溺於人不
可救也

楹銘

母曰胡殘其禍將然母曰胡害其禍將大母曰胡傷其
禍將長

杖銘

惡乎危於忿戾惡乎失道於嗜欲惡乎相忘於富貴

帶銘

火滅修容慎戒必共共則壽

屨銘

慎之勞勞則富

觴豆銘

食自杖食自杖戒之僇僇則逃

戶銘

夫名難得而易失無勤弗志而曰我知之乎無勤弗及而曰我杖之乎掇阻以泥之若風將至必先搖搖雖有聖人不能為謀也

牖銘

隨天之時以地之財敬祀皇天敬以先時

劍銘

帶之以為服動必行德行德則興倍德則崩

弓銘

屈伸之義廢興之行無忘自過

矛銘

造矛造矛少間弗忍終身之羞余一人所聞以戒後世
子孫

右太公所誦丹書之言故武王惕若恐懼書以為戒
於所起居服用皆勒銘如是余從事於俗甚漫意行
不忌晚而待罪太史觀禮書得此銘以覽小人之影

去道遠矣乃書於坐之左右以為息黥補劓之方晁
子曰秦人之炙亦吾嗜也書以遺我故書元祐五年
正月癸酉

題白兆山詩後

雲卧三十年好閒復愛仙蓬壺雖冥絕鸞鶴心悠然歸
來桃花巖得憩雲窗眠對嶺人共語飲潭猿相連時昇
翠微上邈若羅浮巔兩岑抱東壑一嶂橫西天樹雜人
易隱崖傾月難圓芳草換野色飛蘿搖春煙獨此林下

意杳無區中緣永辭霜臺客千載方未還

余聞士大夫嘗勸白兆山僧重素即巖下作桃花菴
素云桃花菴不難作但恨無李白爾今彥顧乃欲鑿
崖石刻李白詩并欲結草其旁以待冠蓋之游者衆
不可蓋安知遂無李白邪為我多謝素師今無白先
尚不廢推鼓升堂豈可臆計世無李白素若有語可
并刻之彥顧安陸李慥也元祐三年十二月己卯黃
庭堅書

跋七佛偈

予往時觀七佛偈於黃龍山中聞鐘聲見古人常願手書千紙以勸道緣而世事匆匆此功未辦蘇臺劉光國欣然請施石刻之傳本何啻千紙也

七佛所說偈蓋禪源也淺陋者爭驚於末流而不知歸故余數為叢林中書此偈荊州田鈞子平聞是說請余書而鐫諸石將以考諸禪濫觴吳孫氏時有僧道裕誦出此七佛偈而集大藏者錄為疑彼蓋不知當時不具

翻譯人此乃最上乘入理之極談非能言之流也

跋虔州學記遺吳季成

眉山吳季成有子資質甚茂季成欲其速成於士大夫之列也夙夜督其不至小小過差則以鞭撻隨之余謂季成教子之意則是所以成就其子則非也吾聞古人胥保惠胥教誨然後可以成就人材未聞以鞭撻也況父子之間哉故手抄王荊公虔州學記遺之使吳君父子相與講明學問之本而求名師畏友以成就之使季

成能慈其子能孝則家道肥不疾而速矣

題樂府木蘭詩後

唐朔方節度使韋元甫得於民間劉原父往時於秘書省中錄得元豐乙丑五月戊申會食於趙正夫平原監郡西齋觀古書帖甚富愛此紙得澄心堂法與者三人石輔之柳仲遠庭堅

題白崖詩後

余曩作葉縣尉葉城南三百步省禪師道場也蓋白崖

老人去家得道於此嘗得白崖歌頌百餘篇及葉城民
家多見書札欽愛其道風高秀也元祐三年三月壬申
同劉晦叔宋僊民伯氏元明觀於淨因臻道人所黃庭
堅題

跋自書所為香詩後

賈天錫宣事作意和香清麗閒遠自然有富貴氣覺諸
人家和香殊寒乞天錫屢惠此香惟要作詩因以兵衛
森畫戟燕寢凝清香作十小詩贈之猶恨詩語未工未

稱此香爾然余甚寶此香未嘗妄以與人城西張仲謀
為我作寒計惠送騏驎院馬通薪二百因以香二十餅
報之或笑曰不與公詩為地耶應之曰詩或能為人作
豈若馬通薪使冰雪之辰鈴下馬走皆有挾纊之溫
邪學詩三十年今乃大覺然見事亦太晚也

書和秋懷五詩後

或笑余詩論公素不實曰公素能擊強則請聞命至於
使民作鄒魯則吾不知也余告之曰公素之擊強亦以

其害善良奪長吏之柄邪將不問皂白姑以其強擊之
耶曰亦擊有罪耳然則予以今之偷一切以規自免萬
事決於老吏之口者為能使民作鄒魯邪夫割者歲更
刀折者月更刀至於不見金牛者十九年而刀刃若新
發於硎公素困頓於衆言之風波既白首矣必知藏器
自愛彼節者有間安用斫大觚以求折缺哉

題自書卷後

崇寧二年十一月余謫處宜州半歲矣官司謂余不當

居闕城中乃以是月甲戌抱被入宿於城南予所僦舍
喧寂齋雖上雨旁風無有蓋障市聲喧憤人以為不堪
其愛余以為家本農耕使不從進士則田中廬舍如是
又何不堪其憂邪既設卧榻焚香而坐與西鄰屠牛之
机相直為資深書比卷實用三錢買鷄毛筆書

題東坡書道術後

東坡平生好道術聞輒行之但不能久又棄去談道之
篇傳世欲數百千字皆能書其所欲言文章皆雄奇

卓越非人間語嘗有海上道人評東坡真蓬萊瀛洲方丈謫仙人也流俗方以造次顛沛秋毫得失欲軒輊困頓之亦疎矣哉

跋東坡所作馬券

翰林蘇子瞻所得天廐馬其所從來甚寵加以妙墨作券此馬價應十倍方叔豆羹常不繼將不能有此馬御以如富貴之家輒曰非良馬也故不售夫天廐雖饒馬其知名絕足亦時有之爾豈可求賜馬盡良也或又責

方叔受翰林公之惠當乘之往來田間安用汲汲索錢
此又不識痒痛者從旁論砭疽爾甚窮亦難忍哉使有
義士能捐二十萬并券與馬取之不惟解方叔之倒懸
亦足以豪矣衆不可蓋遇人中磊磊者試以予書示之

跋相鶴經

王充道得相鶴經飄飄然有乘風御氣於天地間之意
顧所蓄鶴皆卵出凡鳥不可鞭策夢想芝田赤城未得
問塗耳余聞充道之兄道淵治生得陶朱公猗頓之方

頗將心於相牛經殊不虛用其智畧以三十年觀之未
知道淵充道孰得孰失然今日充道卧白雲享天爵已
蒙道淵之力多矣

跋陷蕃王太尉家書

物固不一能士固不一節
鄜寄賣友而存君親君子以
為可況王公不殺身又易其姓而使北敵息其貪忿無
厭之心以從中國之信義賢於李陵遠矣

跋王荊公書陶隱居墓中文

熙寧中金陵丹陽之間有盜發冢得隱起輒於冢中識者買得之讀其書蓋山中宰相陶隱居墓也其文尤高妙王荊公嘗誦之因書於金陵天慶觀齋房壁間黃冠遂以入石子常欲摹刻於焚道有李祥者聞之欣然罄石來請斯文既高妙而王荊公書法奇古似晉宋間人筆墨此固多聞廣見者之所欲得也李君字聖祺焚道人喜炎黃岐雷之書嗜好酸醎與世殊絕常從軍得守國子四門助教歸而杜門家有山水奇觀教諸子讀書

而宴居自從其所好不喜俗人一再見輒罵絕之此孟子所謂有所不為者也

書藥說遺族弟友諒

老夫往在江南貧甚有於日中而空甌無米炊時嘗念貧士不能相活富子不足與語惟作藥肆不飢寒之術也然市中人治藥以丁代丙以乙當甲甚貴則闕不用其治病十不能愈三四積其欺誣子孫凍餒者多矣今余欲作藥肆但取人間急難之疾二十許方擇三四信

行藥童一用聖賢方論時節州土無不用其物宜炮炙生熟無不盡其材性但取四分之息百錢可以起一人之疾如此則日計之不足歲計之有餘謀之熟矣會予登進士第遂不得為之予老在戎州有江南素彬質夫過我道鄉里事以為笑因自言欲作藥肆以濟人為功以娛老為業欣然會予宿心故為道所以盡心於和藥而刻意於救人之說誠用余說不多取贏則濟人博不欺其劑則治疾良他日陰功隱德當築高門以過子孫

之車馬余在荊州訪族伯父晦甫侍御之家見族弟友諒友正亦貧賣藥皆合余說故書遺之

跋王荊公惠李伯牖錢帖

此帖是唐輔文初捐館時也荊公不甚知人疾痛疴瘥於伯牖有此賻卹非常之賜也及伯牖以疾棄官歸金陵又借官屋居之間問其饑寒以釋氏論之似是宿債也

題牧護歌後

鄒嘗問南方衲子云牧護歌是何等語皆不能說後聞
劉夢得作夔州刺史時樂府有牧護歌似是賽神曲然
不可解及在黔中聞賽神者夜歌乃云聽說儂家牧護
末云奠酒燒錢歸去雖長短不同要皆自叙致五方之
語乃知蘓僊嘉州人故作此歌學巴人曲猶石頭學魏
伯陽作參同契也

跋雙林心王銘

費昶召

云云至終章

佛胎召

云云至終章

學士大夫每於此處惟

以歸潔其身君子不器解其章句其心未嘗不快快也
良由未嘗學明已事不識心耳若解雙林此篇則以讀
論語如啖炙自知味矣不識心而云解論語章句吾不
信也後世雖有作者不易吾言矣

書問政先生誥後

故淮浙宣歙管内道門威儀逍遙大師問政先生新安
聶師道宗微少則事道士于方外發迹遊名山數見異
人楊行密開府於揚州宗微實輔佐之蓋為國師三十

年楊氏之未解化而去弟子葬之舉棺惟衣履存焉此
贈誥楊溥私號順義七年也方外之兄德誨為新安太
守乃於郡之東山築屋以居方外號為問政山房問政
之名或得於此誥中大丞相守太師中書令東海王臣
溫徐溫也特進守侍郎尋陽公臣知誥李昇也問政先
生故翰林學士冠卿之五世祖也

跋張龍圖家問

治平中廣帥龍圖直閣張公公載威名盛於南海父老

追數比之古人常恨不知其所以為廣州者今見張公之孫出其家書然後知公特以不貪而蠻獠信服風行草偃耳昔張真為安定屬部誓諸羌曰使馬如羊不以入廩使金如粟不以入懷於是威名出八都尉上羌豪不復起蓋羌夷性貪吏清則以為不可犯而使貪者臨之故蕃夷數叛耳今但多得如張公十數輩守邊則冒功賞者心死矣何畏蠻獠之侵軼哉仁壽郡夫人蓋公載之女弟馬軍王凱勝之之妻也

跋秦氏所置法帖

巴蜀自古多奇士學問文章德慧權畧落落可稱道者
兩漢以來蓋多而獨不聞解書至於諸葛孔明拔用全
蜀之士畧無遺材亦不聞以善書名世者此時方右武
人不得從容筆硯亦無足怪唐承晉宋之俗君臣相與
論書以為能事比前世為甚盛亦不聞蜀人有善書者
何哉東坡居士出於眉山震輝中州蔚為翰墨之冠於
是兩川稍稍能書然其風流不被於巴東黔安又斗絕

入蠻夷中頗有以武功顯者天下一統蓋百餘年而文士終不競黔人秦子明魁梧喜攻伐其自許不肯出趙國珍下不可謂黔中無奇士也子明常以里中兒不能書為病其將兵於長沙也買石摹刻長沙僧寶月古法帖十卷謀舟載入黔中壁之黔江之紹聖院將以驚動里中子弟耳目他日有以書顯者蓋自我發之子觀子明欲變里中之俗其意甚美書字蓋其小小者耳他日當買國子監書使子弟之學務實求是置大經論使桑

門道人皆知經禪則風俗以道術為根源其波瀾枝葉
乃有所依而建立古之能書者多矣磨滅不可勝紀其
傳者必有大過於人者耳子明名世章今為左藏庫副
使東南第八將紹聖院者子明以軍功得請於朝為陣
亡戰士追福所作佛祠也刻石者潭人湯正臣父子皆
善摹刻得於手而應於心近古人用筆意云

辨菴字

今俗書庵字既於篆文無有又菴非屋不當從广三國

志焦光傳云居蝸牛廬中意是今菴也後漢皇甫規為
中郎將持節監關中兵會軍大疫死者十三四親入菴
廬巡視三軍感悅即用此菴字為有據依

跋亡弟嗣功列子冊

列子書時有合於釋氏至於深禪妙句使人讀之三數
蓋普通中事不自葱嶺傳來信矣亡弟嗣功讀是書至
於潰敗猶緝而讀之其苦學好古後生中殆未之見也
紹聖中余自繕治而藏之少年輩竊取玩之又毀裂幾

不可挾唐坦之復為緝之智與上人喜異聞故以遺之

書贈宗室景道

余與宗室越宮有葭莩故曩時與宣州院公壽景珍嘗
共文酒之樂此時景道已能著帽在旁今日相見景道
頽然立於朝班予則將老矣每懷公壽景珍則見宣州
子弟而慨然景道乞余小字學書余書不足學也此紙
卷是余溫故之餘忠信孝友之說景道喜觀字畫乎則
亦尋繹此文於行已保家奉公報國有會心處將力行

之尚不負余懷公壽景珍之心

書吳無至筆

有吳無至者豪士晏叔原之酒客二十年時余屢嘗與之飲飲間喜言士大夫能否似酒俠也今乃持筆刀行賣筆於市問其居乃在晏丞相園東作無心散卓小大皆可人意然學書人喜用宣城諸葛筆著臂就案倚筆成字故吳君筆亦少喜之者使學書人試提筆去紙數寸書當左右如意所欲肥瘠曲直皆無憾然則諸葛筆

敗矣許雲封說笛竹陰陽不備遇知音必破若解此處
當知吳葛之能否元祐四年四月六日門下後省食罷
曾中幅幅須煮茶試晁以道所作究煤賢君散卓遂竟
此紙

書侍其瑛筆

南陽張又祖喜用郎奇棗心散卓能作瘦勁字它人所
繫筆多不可意今侍其瑛秀才以紫毫作棗心筆合墨
圓健恐又祖不得獨貴郎奇而捨侍其也筆無心而可

書小楷此亦難工要是心得妙處耳

宣城諸葛高三副筆鋒雖盡而心故圓此為有輪扁斲
輪之妙弋陽李展雖距書蠅頭萬字而不頓如庖丁發
矧之刃其餘雖得名於數州有工輒有拙也今都下筆
師如蝟毛作無心棗核筆可作細書宛轉左右無倒毫
破其鋒可告以諸葛高李展者侍其瑛也瑛有思致尚
能進於今日也

書贈俞清老

清老金華俞子中也三十年前與余共學於淮南元豐甲子相見於廣陵自云荆公欲使之脫逢掖著僧伽黎奉香火於半山宅寺所謂報寧禪院者也予之僧名曰紫琳字清老清老無妻子之累去作半山道人不廢入俗談諧優游以卒歲似不為難事然生龜脫筒亦難堪忍後數年見之儒冠自若也因戲和清老詩云索索葉自雨月寒遙夜闌馬嘶車鐸鳴羣動不遑安有人夢超俗去髮脫儒冠平明視清鏡政爾良獨難子瞻屢哦此

詩以為妙也元和四年十一月十一日歸自門下省書
於鬴池寺南退聽堂下

人生歲衣十匹日飯兩杯而終歲蕭然疲後此何理邪
男女昏嫁緣渠儂墮地自有衣食分齊所謂誕置之隘
巷牛羊腓字之其不應凍餓溝壑者天不能殺也今蹙
眉終日者正為百草憂春雨耳青山白雲江湖之水湛
然可復有不足之歎邪

米黻元章在揚州游戲翰墨聲名籍甚其冠帶衣襦多

不用世法起居語默畧以意行人往往謂之狂生然觀其詩句合處殊不狂斯人蓋既不偶於俗遂故為此無町畦之行以驚俗爾清老到揚計元章必相好然要當以不鞭其後者相琢磨不當見元章之吹竽又建鼓而從之也

余童子時就學於淮南與金華俞清老同研席嘗作七言長韻贈清老小兒無繩墨放蕩之言然清老至今班班能誦之邇來相見各白髮矣余又以病屏酒不舉肉

多年清老相過持蔬飯茗飲道舊終日爾清老性耿介
不能容俗人間輒使酒嫚罵以是俗子多謗譏清老自
若也以故善人君子終愛之清老淹留京師不偶將復
岸巾風月於江湖之上於其將行也乞言余曰陶淵明
云此中有真意欲辯已忘言夫真處蓋可為知者道難
為俗人言也清老老於言語之風波智必及此行矣自
愛

書螺磯

螺似蛇四足能害人賈生所謂蝸蝓以隱處者也今
螺磯有老螺寺僧能得其嗜欲客宿者輒為螺所啗

書韋許扇

自重者能下人以求道處靜者不攘臂而勝躁深道者
常晚成遠施者常厚報以能問於不能人之道損有餘
以補不足天之道

書小宗香

南陽宗少文嘉邈江湖之間援琴作金石弄遠山皆與

之同聲其文獻足以配古人孫茂深亦有祖風當時貴人欲與之游不得乃使陸探微畫像掛壁觀之聞茂深閉閣焚香作此香饋之時謂少文大宗茂深小宗故傳小宗香云

題練光亭

練光亭極是登臨勝處然高寒不可久處若於亭北穿土石作一幽房置茶鑪設明窗瓦墩筆研殊勝不爾勝師方丈北挾有屋兩楹其一開軒其一欲作虛窗與室

余為名軒曰物外主人喜作詩也名室曰凝香密而清明於事稱也

書贈韓瓊秀才

讀書欲精不欲博用心欲純不欲雜讀書務博常不盡意用心不純訖無全功治經之法不獨玩其文章談說義理而已一言一句皆以養心治性事親處兄弟之間接物在朋友之際得失憂樂一考之於書然後嘗古人之糟粕而知味矣讀史之法考當世之盛衰與君臣之

離合在朝之士觀其見危之大節在野之士觀其奉身之大義以其日力之餘玩其華藻以此心術作為文章無不如意何況翰墨與世俗之事哉

書幽芳亭

士之才德蓋一國則曰國士女之色蓋一國則曰國色蘭之香蓋一國則曰國香自古人知貴蘭不待楚之逐臣而後貴之也蘭蓋甚似乎君子生於深山叢薄之中不為無人而不芳霜雪凌厲而見殺來歲不改其性也

是所謂避世無悶不見是而無悶者也蘭雖含香體潔
平居蕭艾不殊清風過之其香藹然在室滿室在堂滿
堂是所謂含章以時發者也然蘭蕙之才德不同世罕
能別之予放浪江湖之日久乃盡知其俗姓蓋蘭似君
子蕙似士大槩山林中十蕙而一蘭也楚辭曰予既滋
蘭之九畹又樹蕙之百畝以是知不獨今楚人賤蕙而
貴蘭久矣蘭蕙叢生初不殊也至其發華一幹一華而
香有餘者蘭一幹五七華而香不足者蕙蕙雖不若蘭

其視椒櫨則遠矣世論以為國香矣乃曰當門不得不鋤山林之士所以往而不返者耶

書壺中九華山石

湖口民李正臣得奇石九峯相倚蘇子瞻戲名曰壺中九華又有老巫鄒生以三奇石隨高下體著成屏風三疊余戲名曰肘後屏風疊他日湖中石百怪並出當以此兩石為祖云二石色紺青嵌孔貫穿擊之鏗鏗而視之嵌崱雲雨之上諸峯隱見忽然疑於九十猶五老峯

之疑於五六也揭而視俗以求賞音吾見其覆醬瓿堆
牆角也世有出塵之因然後此石為瀟灑緣爾邇者象
江太守費數十萬錢自嶺南負載三石比歸妻子不免
寒餓未知與此孰賢也



山谷集卷二十五

欽定四庫全書

集部

山谷集卷二十六至
八

詳校官庶吉士臣胡鉅

檢討臣何思鈞覆勘

總校官進士臣朱鈐

校對官修撰臣戴衢亨

謄錄監生臣楊武墉

欽定四庫全書

山谷集卷二十六

宋 黃庭堅 撰

題跋

書陶淵明責子詩後

觀淵明之詩想見其人豈弟慈祥戲謔可觀也俗人便謂淵明諸子皆不肖而淵明愁歎見於詩可謂癡人前不得說夢也

題李白詩草後

余評李白詩如黃帝張樂於洞庭之野無首無尾不主故常非墨工槩人所可擬議吾友黃介讀李杜優劣論曰論文政不當如此余以為知言及觀其藁書大類其詩彌使人遠視慨然曰在開元至德間不以能書傳今其行草殊不減古人蓋所謂不煩繩削而自合者歟

跋書柳子厚詩

予友生王觀復作詩有古人態度雖氣格已超俗但未

能從容中玉佩之音左準繩右規矩爾意者讀書未破
萬卷觀古人之文章未能盡得其規摹及所總覽籠絡
但知玩其山龍黼黻成章耶故手書柳子厚詩數篇遺
之欲知子厚如此學陶淵明乃為能近之耳如白樂天
自云效陶淵明數十篇終不近也

跋劉夢得淮陰行

淮陰行情調殊麗語氣尤穩切白樂天元微之為之皆
不入此律也唯無耐脫萊時不可解當待博物洽聞者

說也

後見古本
作挑菜時

跋劉夢得竹枝歌

劉夢得竹枝九章詞意高妙元和間誠可以獨步道風俗而不俚追古昔而不愧比之杜子美夔州歌所謂同工而異曲也昔東坡嘗聞余詠第一篇歎曰此奔軼絕塵不可追也

跋劉夢得三閤辭

此四章可以配黍離之詩有國存亡之鑑也大槩劉夢

得樂府小章優於大篇詩優於它文耳

書徐會稽禹廟詩後

越州應天釋希圓姑蘇人避地甬東所居小房即琅琊
山頂也山下有井井有鰻鱧魚水有盈縮與江湖相應
甚多靈怪按爾雅山有穴為岫今季海詩云孤岫龜形
在乃不成語蓋謝玄暉云窻中列遠岫已誤用此字季
海亦承誤耳按楚詞云收恢台之孟夏恢大也台即胎
也言夏氣大而育物也今言高閣無恢台直言無暑氣

耳似不合古語爾雅云夏為長羸長羸即恢台也若言
高閣無長羸可乎能奴登切獸名熊屬足似麀鹿絕有
力故有絕人之才者謂之能能囊來切三足鼈也今於
來字韻中用法士多壞能乃是僧似鼈耳然魏晉人作
詩多如此借韻至李杜韓退之無復此病耳壯大壯之
壯壯牝壯之壯規模稱壯哉必壯字誤書耳魏晉人用
字亦多如此蓋取字勢易工不復問字之根源如古人
橋橋直直皆不成字

跋子瞻醉翁操

人謂東坡作此文因難以見巧故極工余則以為不然
彼其老於文章故落筆皆超軼絕塵耳

跋子瞻木山詩

往嘗觀明允木假山記以為文章氣旨似莊周韓非恨
不得趨拜其履舄間請問作文闕紐及元祐中乃拜子
瞻於都下實聞所未聞今令其人萬里在海外對此詩
為廢卷竟日

跋子瞻送二姪歸眉詩

觀東坡二丈詩想見風骨嶢巖而接人仁氣粹溫也觀黃門詩頎然峻整獨立不回在人眼前元祐中每同朝

班余嘗目之為成都兩右笋也

右或作石

跋東坡樂府

缺月挂疎桐漏斷人初定時見幽人獨往來縹渺驚鴻影驚起却回頭有恨無人省揀盡寒枝不肯棲寂寞沙

洲冷

東坡道人在黃州時作語意高妙似非喫煙火食人語非胸中有萬卷書筆下無一點塵俗氣孰能至此

書王元之竹樓記後

或傳王荆公稱竹樓記勝歐陽公醉翁亭記或曰此非荆公之言也某以謂荆公出此言未失也荆公評文章常先體制而後文之工拙蓋嘗觀蘇子瞻醉白堂記戲曰文詞雖極工然不是醉白堂記乃是韓白優劣論耳以此考之優竹樓記而劣醉翁亭記是荆公之言不疑

也

書筠州學記後

中書魯舍人作高安學記極道世之所由興廢論士大夫之師友淵源常出於一世豪傑之士至於長育人材而成就之則在當塗之君子其言有開塞一可以為法戒而所託書畫不工學者因不能玩思於斯文後二十有七年柳侯為州政優民和乃礱故刻而乞書於予予告之以舍弟乘雅善小篆通六書之意下筆皆有依據

可與斯文並傳柳侯則以書求乘於紫陽而刻之初有
獻疑者曰今世士大夫不知文十室而九夫篆固古人
之書耳又安能發揮曾子之文章耶柳侯曰曾子之文
章豈希價于咸陽而摧鋒于稷下者哉三代之鼎彝其
字書皆妙蓋勒之金石垂世傳後自必託於能者吾為
學古鉤深者謀不為單見淺聞者病也予觀柳侯可謂
好學不流俗者矣柳侯名平武陵人字子儀於是為左
朝請郎

題韓忠獻詩杜正獻草書

杜子美一生窮餓作詩數千篇與日月爭光永州僧懷
素學草書坐卧想成筆畫三十年無完衣彼乃得自名
一家死者不可作今觀尚書令韓忠獻公詩太師杜正
獻公作草安用忍如許窮餓

跋雷太簡梅聖俞詩

余聞雷太簡才氣高邁觀此詩信如所聞也梅聖俞與
余婦家有連嘗悉見其平生詩如此篇是得意處其用

字穩實句法刻厲而有和氣它人無此功也

書劉景文詩後

劉景文樞密副使盛文肅公之壻於先妣安康郡君尚
為丈人行然景文不以尊屬臨我以翰墨文章見謂親
友余嘗評景文胸中有萬卷書筆下無一點俗氣往歲
東坡先生守餘杭而景文以文思副使為東南第三將
東坡嘗云老來可以晤語者凋落殆盡唯景文可慰目
前耳身後圖書漂散余亦鬚髮盡白今對此詩令人氣

塞

書歐陽子傳後

高安劉義仲壯輿序列歐陽文忠公之文章論次荀卿揚子雲之後又考其行事為歐陽子列傳余三讀其書而告之曰昔壯輿之先君子道原明習史事撰十國紀年自成一家今壯輿富於春秋筆端已有史氏風氣它日當以不朽之事相傳也昔司馬談之子遷劉向之子歆班彪之子固王銓之子隱姚察之子簡李大師之子

延壽劉知幾之子鍊皆以繼世功在汗簡而舊史筆法之美劉氏再顯今使壯輿能盡心於春秋之舊章以考百世之典籍斧藻先君子之凡例著是去非則十國之事雖淺筆法所寄自當與日月爭光壯輿尚勉之之楚而南轅道雖悠遠要必至焉

書所作官題詩後

元祐三年閏六月十七日少章携此澄心堂紙問余疾於城西余方病瘍意慮無聊為寫比來戲效諸生作數

詩余為兒時見進士劉韶用烏田紙寫賦嘗竊笑以
為用隋侯之珠彈雀使韶今在豈免一笑耶

跋招清公詩

草堂鄭交處士隱處也小塘芙蕖盛開使鷄伏鴛鴦
卵與人馴狎不驚畏老禪延恩長老法安師懷道遯世
雖與慧林本法雲秀同師頗以討飯養千百閒漢為笑
也清公少時蓋依之數年嘗教誨道俗云萬事隨緣
是安樂清法公云如安禪師心無簡擇可愛可飲舟中

晴暖閒弄筆墨為太和釋智興書

題古樂府後

古樂府有巴東三峽巫峽長猿鳴三聲淚沾裳但以抑
怨之音和為數疊惜其聲今不傳余自荊州上峽入黔
中脩嘗山川險阻因作前二疊傳與巴娘令以竹枝歌
之前一疊可和云鬼門關外莫言遠五十三驛是皇州
後一疊可和云鬼門關外莫惆悵四海一家皆弟兄或
各用四句入陽關小秦王亦可歌也

題意可詩後

寧律不諧而不使句弱用字不工不使語俗此庾開府之所長也然有意於為詩也至於淵明則所謂不煩繩削而自合雖然巧於斧斤者多疑其拙窘於檢括者輒病其放孔子曰甯武子其智可及也其愚不可及也淵明之拙與放豈可為不知者道哉道人曰如我按指海印發光汝暫舉心塵勞先起說者曰若以法眼觀無俗不真若以世眼觀無真不俗淵明之詩要當與一丘一

壑者共之耳

書林和靖詩

歐陽文忠公極賞林和靖疎影橫斜水清淺暗香浮動
月黃昏之句而不知和靖別有詠梅一聯云雪後園林
纔半樹水邊籬落忽橫枝似勝前句不知文忠公何緣
棄此而賞彼文章大槩亦如女色好惡止繫於人

書王知載胸山雜詠後

詩者人之情性也非強諫爭於廷怨忿詬於道怒鄰罵

坐之為也其人忠信篤敬抱道而居與時乖逢遇物悲
喜同牀而不察並世而不聞情之所不能堪因發於呻
吟調笑之聲胸次釋然而聞者亦有所勸勉比律呂而可
歌列干羽而可舞是詩之美也其發為訕謗侵陵引頸
以承戈披襟而受矢以快一朝之忿者人皆以為詩之
禍是失詩之旨非詩之過也故世相後或千歲地相去
或萬里誦其詩而想見其所居所養如旦暮與之期
鄰里與之游也營丘王知載仕宦在予前予在江湖浮

沈而知載已沒於河外不及相識也而得其人於其詩
仕不遇而不怒人不知而獨樂博物多聞之君子有文
正公家風者邪惜乎不幸短命不得發於事業使予言
信於流俗也雖然不期於流俗此所以為君子者耶元
符元年八月乙巳戎州寓舍退聽堂書江西黃庭堅責
授涪州別駕戎州安置年五十四

題所書詩卷後與徐師川

徐師川往時寄紙數軸求予書公私多故未能作報前

日洪龜父攜師川上藍莊詩來詞氣甚壯筆力絕不類
年少書生意其行已讀書皆當老成解事熟讀數過為
之喜而不寐小舟邀兀又箱篋中尋紙不得輒書龜父
此紙奉師川老舅年衰才劣不足學師川有意日新之
功當於古人中求之耳

書邢居實南征賦後

陽夏謝師復景回年未二十文章絕不類少年書生語
余嘗序其遺藁云方行萬里出門而車軸折可為實

涕今觀邢惇夫詩賦筆墨宜自為一家甚似吾師復也
日者閱國馬問諸圉人曰千里駒往往不及奉輿斃於
阜樞駕蹇十百為羣未嘗求國醫也聞之喟然曰吾惇
夫亦足以不朽矣

書邢居實文卷

余觀學記論君子之學有本末等第人雖不能自期壽
百歲然必不躡等如水行川盈科而後進耳小學之事
雖若糜費日月要須躬行必曉所以致大學之精微耳

吾惇夫才性高妙超出後生千百輩然好大略小初日便為塗遠之計則似可恨後生可畏當欣慕其才而鑒其失也

跋所寫答小邢止字韻詩并和晁張八詩與徐師

川

邢居實字惇夫才器甚過人未嘗友不如己者治經行已未嘗一日不用其心使之成就可畏也因隨州寄詩來詩律極進故和答之如此後八詩頗得意者故漫錄

往或詣潘洪諸友讀之往時曾寫二十許篇與魏道
輔和答詩贈德延不審常見之否或不曾見續當
錄云

跋王慎中胡笳集句

湓城王寅慎中擬半山老人集句胡笳十八拍其會合
宛轉道文姬中心事甚妙慎中文士孝友清修年三十
八未嘗知女色葷羶不入口一粥一飯三十年奉身如
山中頭陀初無玷缺山中人初不接世事故其行易持

觀慎中詩語所道閨闈中意不應是鐵人石心然能自護持如此所以為難

跋歐陽元老詩

此詩入陶淵明格律頗雍容使高子勉追之或未能然子勉作唐律五言數十韻用事穩帖置字有力元老亦未能也

跋高子勉詩

高子勉作詩以杜子美為標準用一事如軍中之令

置一字如關門之鍵而充之以博學行之以溫恭天下士也

題王觀復所作文後

王觀復作書語似沈存中它日或當類其文然存中博極羣書至於左氏春秋傳班固漢書取之左右逢其原真篤學之士也觀復下筆不凡但恐讀書少耳如梓州生陳子昂之文章趙蕤之術智皆所謂人傑地靈也何必城南有錦屏山哉余意錦屏山但能生富貴人耳

跋胡少汲與劉邦直詩

夢魂南北昧平生邂逅相逢意已傾
楚國山川千疊遠隨隄煙雨一帆輕
我無健筆翻三峽君有長才肅五兵
同是行人更分首不堪風樹作離聲

丁丑年十月

胡少汲後生中豪士也讀書作文殊不塵埃使之不
倦雖競爽者未易追也同是行人更分首佳句也邂逅
相逢意已傾已道了劉三十一矣

書洞山价禪師新豐吟後

余舊不喜曹洞言句常懷涇渭不同流之意今日偶味此文皆吾家日用事乃知此老人作百衲被歲久天寒方知用處浮山注解雖為報大陽十載之恩又似孤負新豐老人耳文會上座乞書此篇欲刻諸石與同味者傳之因書老夫於此興復不淺

跋王介甫帖

余嘗評東坡文字言語歷劫贊揚有不能盡所謂竭世樞機似一滴投于巨壑者也而此帖論劉敞侍讀晚年

文字非東坡所及。蚍蜉甘帶鴟鴞嗜鼠端，不虛語。

書王荊公贈俞秀老詩後

秀老蓋金華俞紫芝道意淳熟。然建隆昭慶道人謂秀老百事過人，病在好說俗禪。秀老以為知言也。秀老作唱道歌十篇，欲把手牽一切人同入涅槃場。雖未見策名釋迦之室，然林下水邊幽人衲子，往往歌之以遣意於萬物之表，厭而飫之，使自超之功亦過半矣。來者未知秀老觀荊公所贈六詩，可知其人品高下也。初僧仁

擇刻六書於揚州禪智寺真覺堂而秀老弟紫琳清老
又欲刻之東陽涵碧亭嘉其伯仲清尚故書

書玄真子漁父贈俞秀老

金華俞秀老物外人也嘗作唱道歌十章極言萬事如
浮雲世間膏火煎熬可厭語意高勝荆公樂之每使人
歌秀老又有與荆公往反游戲歌曲皆可傳長于白下
舟人蘆子或能記憶也此漁父計秀老必喜之輒因清
老遠寄幸可同作

跋贈俞清老詩

俞清老舊與庭堅同學才性警敏無所不能喜事而多
聞白頭不倦詼諧戲弄則似優孟東方朔之為人然資
亦辯急少不當其意使酒呵罵又似灌夫蓋寬饒以是
忿愠欲祝髮著浮圖人衣曰免與俗子浮沉予曰公能
少自寬俗子安能為輕重去而與祝髮者游其中雖有
道人亦如沅江九肋鼈爾與俗子為伍方自此始清老
蓋疑之至今云

跋俞秀老清老詩頌

秀老清老皆江湖扁舟不能受流俗人拘忌束縛者也
往者金陵見與荆公往來詩頌言皆入微道人喜傳之
清老往與余共學於漣水其傲睨萬物滑稽以玩世白
首不衰荆公之門蓋晚多佳士云

跋二蘇送梁子熙聯句

大榮大辱能生死人叔才二物不並以撓厥真子美之

子病悶腸如車輪叔才勞憂到母餓寒著身子美世俗

鹵莽輒置莫親

叔才

文彩光艷伏不得伸

子美

悽吟哀

號酸入四鄰

叔才

夜計破午若燕作秦

子美

腹憤軋軋

冒竒陳陳

叔才

淮國晚嶺吳渠春津

子美

去謝夙蘊歸

逢故辛

子美

雌火相丑刮鑿遯屯

叔才

駕風鞭霆以脫

凡鱗

子美

景祐元年仲春子美於蜀綾紙上楷寫字極端勁可

愛叔才蓋才翁舊字此篇不見於家集略計雄文妙

墨流落人間者必千數百紙二蘇文章豪健痛快如

此潘陸不足吞也

書秦觀詩卷後

少章別來踰年文字亶亶日新不惟助秦氏父兄驩喜
予與姚張諸友亦喜交游間當復得一國士然力行所
聞是此物之根本冀少章深根固蒂令此枝葉暢茂也
書陳亞之詩後

岷山之發江僅若甕口淮出桐栢力能泛觴卒之成川
注海以其所從來遠也學問文章震耀一世考其祖魯

發源必有自陳氏昆仲多賢是中將有名世者觀吏部公之詩可謂源清矣

書鮮洪範長江詩後

余昔聞蜀人有魯三江者號稱能詩士大夫多宗之今觀閬州鮮長江詩不甚愧之也雖切磋琢磨之功少而渾厚之氣幾度其前矣昔方士表天網見閬州錦屏山題其石曰此山磨滅英靈乃絕然予在中朝唯聞陳文忠公家世出才士嘗疑山水之秀豈獨鍾於陳氏耶其

沈淪草萊困頓州縣抱才器而與麋鹿共盡者可勝道哉今觀鮮長江之才所謂困頓州縣者也使之學不盡其才名不聞於世亦其鄉之先達士大夫之罪也蓋道不明於天下則士不知擇術道不行於天下則民之毀譽不公豈獨士大夫之罪哉其所從來遠矣鮮氏唯以閬中為族姓其散漫於兩蜀者皆以閬中為祖今試問鮮氏所自出皆不能自言或云出於鮮于後去于而為鮮以余考之非是蜀李壽時司徒鮮明用事專廢立

其鮮氏之祖歟

跋元聖庚清水巖記

彼險而我易則傳說熙然於版築之間無驚世不顧之
譏彼易而我險則虞芮二子釋然於岐山之下得遷善
不爭之美由是觀之險易之實在人心不在山川夫奇
與常相倚也險與易相乘也古之人正心誠意而游於
萬物之表故六經我之陳迹也山林冠冕吾又何擇焉
因聖庚論好奇履險故發予之狂言

題王子飛所編文後

建中靖國元年冬觀此書於沙市舟中鄙文不足傳世
既多傳者因欲取所作詩文為內篇其不合周孔者為
外篇然不暇也它日合平生雜草蒐獮去半而別為二
篇乃能終此意云

山谷集卷二十六

欽定四庫全書

山谷集卷二十七

宋 黃庭堅 撰

題跋

題校書圖後

唐右相閻君粉本北齊校書圖士大夫十二員執事者
十三人坐榻胡牀四書卷筆研二十二投壺一琴二懶
几三搯頭一酒榼果榼十五一人坐胡牀脫帽方落筆

左右侍者六人似書省中官長四人共一榻陳飲具其一下筆疾書其一把筆若有所營構其一欲逃酒為一同舍挽留之且使侍者著鞞兩榻對設坐者七人其一開卷其一捉筆顧視若有所訪問其一以手拄頰顧侍者行酒其一抱膝坐酒旁其一右手執卷左手據摺頤其一右手捉筆拄頰左手開半卷其一仰負懶几左右手開書筆法簡者不缺煩者不亂天下奇筆也右故奉議郎知富順監京兆宋元壽所藏初得之滎陽盛孟

適蓋文肅公家舊物也建中靖國元年二月甲午江西
黃庭堅自戎州來將下荊州泊舟漢東市始識富順君
之子兆吉長觀此畫歎賞彌日吉長舉以見惠余不忍
取為書其大槩使并藏之此筆墨之妙必待精鑒乃出
示之廉者必不取貪者必不與也趙潤甫家燭下書

題渡水羅漢畫

右摹寫唐人畫行脚僧渡水已渡而休與泛濟而未及
濟者涉深水者老憊極少者扶持幾欲不濟者有臨流

未涉者有見險在前依石坐卧者頗極其情狀明窓淨
几散髮解衣而縱觀之亦是幻法中無真假往在都時
馮當世有此畫本是古人勦業縑素也題云王右丞畫
渡水羅漢余為題云阿羅漢皆具神通何至拖泥帶水
如此使王右丞作羅漢畫如此何處有王右丞耶當世
不悅為余題破渠好畫余曰顧畫何如豈因譽而完因
毀而破也

跋浴室院畫六祖師

浴室院有蜀僧令宗畫達摩西來六祖師人物皆妙絕其山川草木羽毛衣盂諸物畫工能知之至於人有懷道之容投機接物目擊而百體從之者未易為俗人言也此壁列於冠蓋之會而湮伏不聞者數十年得蜀人蘇子瞻乃發之物不系於世道興衰亦有數如此此寺井泉甘寒汝師碾建溪茶常不落第二故人陳季常林下士也寓基簾於此蘇子瞻范子功數來從之故余過門必稅駕焉

題七才子畫

眉山老書生作此七才子入關圖作人物亦各有意態余
以為趙子雲之苗裔摹寫物象漸密而放浪閒遠則不
逮也或謂七人者皆詩人此事乃少丘壑耶山谷曰一
丘一壑自須其人曾次有之但筆間那可得

題濟南伏勝圖

御史晁大夫號為峭直刻深觀所寫形質似未至也然
作伏勝宛然故齊之老書生耳又作勝女子鬱然是儒

家子此亦丹青之妙

題趙公佑畫

黟川呂太淵藏此畫以為趙公佑畫也以余觀之誠妙於筆非俗工所能辦也余初未嘗識畫然參禪而知無功之功學道而知至道不煩於是觀圖畫悉知其巧拙工俗造微入妙然此豈可為單見寡聞者道哉

題摹鎖諫圖

陳元達千載人也惜乎剞業作鎖者胷中無千載韻耳

吾友馬中玉云鎖諫圖規摹病俗人物非不足也以余考之中玉英鑒也使元達作此觚鼻豈能死諫不悔哉然畫筆亦入能品不易得也

題摹燕郭尚父圖

凡書畫當觀韻往時李伯時為余作李廣奪胡兒馬挾兒南馳取胡兒弓引滿以擬追騎觀箭鋒所直發之人馬皆應弦也伯時笑曰使俗子為之當作中箭追騎矣余因此深悟畫格此與文章同一關紐但難得人入

神會耳

題明皇真妃圖

此圖是名畫言少時摹取關中舊畫人物相配合之
故人物雖有佳處而行布無韻此畫之沈痾也

題輞川圖

王摩詰自作輞川圖筆墨可謂造微入妙然世有兩本
一本用矮紙一本用高紙意皆出摩詰不疑臨摹得人
猶可見其得意於林泉之髣髴

題洪駒父家江千秋老圖

此軸不必問畫手之工拙開之廓然見漁父家風使人已在塵埃之外矣固知金華俞秀老一篇政在阿堵中因書其左

書文湖州山水後

吳君惠示文湖州晚靄橫卷觀之歎息彌日蕭洒大似王摩詰而工夫不減關同東坡先生稱與可下筆能兼衆妙而不言其善山水豈東坡亦未嘗見耶此畫初入

手心欲留玩數月乃歸之會予遠竄宜州亟遣光山之僕自此往來余夢寐中耳

跋東坡論畫

子瞻論畫語甚妙比聞一僧藏蘇翰林十數帖因病目盡為綠林君子以其摹本易去故以予家兩古印款紙斷處

陸平原之圖形於影未盡捧心之妍察火於灰不覩燎原之實故問道存乎其人觀物必造其質此論與東坡

照壁語託類不同而實契也又曰情見於物雖近猶踈神藏於形雖遠則密是以儀天步晷而修短可量臨淵揆水而淺深可測此論則如語密而意疎不如東坡得之濠上也雖然筆墨之妙至於心手不能相為南北而有數存焉於其間則意之所在者猶是國師天津橋南看弄胡孫西川觀競渡處耳予嘗見吳生佛入涅槃畫波旬皆作舞而大波旬醞籍徐行喜氣滿於眉宇之間此亦得之筆墨之外或有益於程氏故并書之

跋東坡畫石

以富貴有人易以貧賤有人難夫晉文公出走周流天下窮矣貧矣賤矣而介子推不去有以有之也反國有萬乘而介子推去之無以有之也能其難不能其易此文公之所以不王也晉文公反國介子推不肯受賞自為詩曰有龍于飛周遍天下五蛇從之為之丞輔龍反其鄉得其處所四蛇從之得其雨露雨一蛇羞之槁死於中野懸書公門而伏于山下文公聞之曰嘻是子推也

辟舍變服令國中曰有能得介子推者爵上卿田百萬
或遇之山中負釜蓋登問焉曰請問介子推安在曰夫
子推苟不欲見而欲隱吾獨焉知之遂背而行終身不
見人心之不同豈不甚哉今世之逐利者蚤朝晏退焦
唇乾噉日夜思之猶未之能得今得之而務疾逃之介
子推之離俗遠矣黃庭堅曰晉文公能其難不能其易
何也困窮則士能其難安樂則士辭其易故也介子推
豈故得之而務疾逃之必有謂者邪

書王荊公騎驢圖

荊公晚年刪定字說出入百家語簡而意深常自以為平生精力盡於此書好學者從之請問口講手畫終席或至于餘字金華俞紫琳清老嘗冠禿巾衣掃塔服抱字說追逐荊公之驢往來法雲定林過八功德水逍遙游亭之上龍眠李伯時曰此勝事不可以無傳也

書劉壯輿漫浪圖

子劉子讀書數千卷無不貫穿能不以博為美而討求

其言之從來不可謂漫未見古人如將不得見既見古人曰吾未能如古人也不可謂浪年未四十而其學日夜進不可謂叟

題李伯時憩寂圖

或言子瞻不當目伯時為前身畫師流俗人不領便是語病伯時一丘一壑不減古人誰當作此癡計子瞻此語是真相知

題李伯時畫天女

此天女者意伯時作華嚴中善知識相爾知命藏篋中
數年乃以贈金華俞清老有所欲則富者取之有所畏
則貴者奪之清老離此二病則長有之

題李漢舉墨竹

如蟲蝕木偶爾成文吾觀古人繪事妙處類多如此所
以輪扁斲輪不能以教其子近世崔白筆墨幾到古人
不用心處世人雷同賞之但恐白未肯耳比來作文章
無出無咎之右者便是窺見古人妙斲試以此示無咎

題文湖州竹上鸛鵒

建中靖國元年發篋暴書畫乃見文湖州之妻姪黃
斌老所惠與可竹上鸛鵒此所謂功刮造化窟者也

文湖州竹上鸛鵒曲折有思觀者能言之許渠具一隻
眼

題崔白畫風竹上鸛鵒

風枝調調鸛鵒脩脩遷枝未安何有於巢崔生丹墨
盜造物機後有識者恨不同時

題東坡像

東坡先生天下士嗟乎惜哉今蚤世蠢蠢尚謂短人氣
跋畫山水圖

江山寥落居然有萬里勢老夫髮白矣對此使人慨然
古之得道者以為逃空虛無人之境見似之者而喜矣
既自以心為形役奚惆悵而獨悲會當摩挲雙井巖
間苔石告以此意

題畫娘子軍胡騎後

神堯第三女平陽柴氏主也傾家貲招南山亡命畫策授奴客降知名賊四輩勒兵七萬與秦王會渭水上開幕府可謂天下健婦吾觀伯時妙墨想見清渭照其軍容神堯父子皆為動色時也

跋仁上座橘洲圖

會稽仁上座作橘洲圖余方自塵埃中來觀此已有餘清然古人作畫若不作小李將軍真山真水草木樓臺人物皆令如本則須若荆浩關同李成木石瘦硬煙雲

遠近一以色取之乃為畢其能事

題蕭規龍

此豈曹不興池上所見真龍者耶

題惠崇九鹿圖

惠崇與寶覺同出於長沙而覺妙於生物之情態優
崇與崇得意於荒寒平遠亦翰墨之秀也

題燕文貴山水

風雨圖本出於李成超軼不可及也近世郭熙時得一

筆亦自難得

題陳自然畫

水意欲遠鳬鴨閒暇蘆葦風霜中猶有能自持者予觀
李營丘六幅驟雨圖偶得此意陳君以佛畫名京師戲
作秋水寒禽便可觀因書以遺之

題徐巨魚

徐生作魚庖中物耳雖復妙於形似亦何所賞但令饒
獠生涎耳向若能作底柱析城龍門岌業驚濤險壯使

王鮪赤鯁之流仰波而上泝或其現怪雄傑乘風霆而
龍飛彼或不自料其能薄乘時射勢不至乎中流折角
點額窮其變態亦可以為天下壯觀也

書士星畫

國初有賣藥叟高益涿州人因緣南衙事太宗作搜山
圖極工遂待詔翰林中畫相國寺行廊及崇夏寺殿壁
是名大高待詔後有蜀人高文進以蜀俘至闕亦待詔
翰林中時新作相國寺命文進倣高益舊本畫四廊佛

變化相大率都下佛宮道館多文進筆號為兼備曹吳
采墨是名小高待詔今為翰林畫工之宗此畫多蜀人
筆法亦傳是小高所作落筆高妙名不虛得也

題畫醉僧圖

醉李有狂僧無日不飲酒或戲與酒令自作祭文即應
聲曰惟靈生在閻浮提中不貪不妬愛喫酒子倒街卧
路想汝直待生兜率陀天爾時方斷得過何以故淨土
之中無酒得酤

題宗室大年永年畫

調麝煤作花果株難工永年遂臻此殊不易然作朽蠹
太多是其小疵

往時宗室或以隸篆知名今大年兄弟精於小筆疊疊
似諸李矣

大年學東坡先生作小山叢竹殊有思致但竹石皆覺
筆意柔嫩蓋年少喜奇故耳使大年耆老自當十倍於
此若更屏聲色裘馬使冑中有數百卷書便當不愧文

與可矣

大年兒戲所謂書窓浣壁不能嗔者也今其得意遂與
小李將軍爭衡耶

荒遠閒暇亦有自得意處比之古人但少豪壯及餘味
爾

大年往時畜善舞錢娃於其家而不沈於盃盎管絃戲
弄翰墨亦是不為富貴所埋沒者耶

永年作狗意態甚逼遣翰林工訖其草石

不敢畫虎憂狗之似故直作狗人難我易

山谷集卷二十七

欽定四庫全書

山谷集卷二十八

宋 黃庭堅 撰

題跋

題太宗皇帝御書

熙陵以武定四方載橐弓矢文治之餘垂意翰墨妙盡
八法當時士大夫皆親承指畫嘗稱獎忠懿王筆法入
神品中外書學不能出其右仰觀英鑒大不可誣

跋蘭亭

王右軍禊飲序草號稱最得意書宋齊以來似藏在祕府士大夫間未聞稱述豈未經大盜兵火時蓋有墨蹟在蘭亭右者及蕭氏宇文焚蕩之餘千不存一永師晚出所見妙迹唯有蘭亭故為虞褚輩道之所以太宗求之百方期於必得其後公私相盜今竟失之書家晚得定武石本蓋髣髴存古人筆意耳

又跋蘭亭

蘭亭叙草王右軍平生得意書也反復觀之略無一字
一筆不可人意摹寫或失之肥瘦亦自成妍要各存之
以心會其妙處爾

蘭亭雖是真行書之宗然不必一筆一畫以為準譬如
周公孔子不能無小過過而不害其聰明睿聖所以為
聖人不善學者即聖人之過處而學之故蔽於一曲今
世學蘭亭者多此也魯之閉門者曰吾將以吾之不可
學柳下惠之可以學書矣

書右軍帖後

曹蜍李志輩書字政與右軍父子爭衡然不足傳也所謂敗壁片紙皆傳數百歲特存乎其人耳

書右軍文賦後

余在黔南未甚覺書字綿弱及移戎州見舊書多可憎大槩十字中有三四差可耳今方悟古人沉著痛快之語但難為知音爾李翹叟出褚遂良臨右軍書文賦豪勁清潤真天下之奇書也

題瘞鶴銘後

右軍嘗戲為龍爪書今不復見余觀瘞鶴銘勢若飛動
豈其遺法邪歐陽公以魯公書宋文貞碑得瘞鶴銘法
詳觀其用筆意審如公說

題樂毅論後

予嘗戲為人評書云小字莫作癡凍蠅樂毅論勝遺教
經大字無過瘞鶴銘隨人作計終後人自成一家始逼
真然適作小楷亦不能擺脫規矩客曰子何捨子之凍

蠅而謂人凍蠅予無以應之固知書雖棊鞠等技非得
不傳之妙未易工也

題東方朔畫贊後

予嘗觀東方畫贊墨跡疑是吳通微兄弟書然不敢質
也遣筆結字極似通微書黃庭外景也如佛頂石刻止
是經生書不可引與同列矣

題洛神賦後

予嘗疑洛神賦非子敬書然以字學筆力去之甚遠不

敢立此論及今觀之宋宣獻公周膳部少加筆力亦可
及此

跋法帖

書孔明對劉玄德語章草法甚妙不知與王中令書先
後要皆為妙墨蓋融會張芝索靖兩家骨肉豐殺略相
宜爾

蔡琰胡笳引自書十八章極可觀不謂流落僅餘兩句
亦似斯人身世耶

鍾繇書大小世有數種余特喜此小字筆法清勁殆欲不可攀也觀史孝山出師頌數種頗得草法蓋陶冶草法悲自小篆中來

山公啓論人其言誠有味哉

余觀凝之字法最密恨不多見

庾公所作支髮枕蓋今俗謂山枕

索征西筆短意長誠不可及長沙古帖中有急就章數十字劣於此帖今人作字大槩筆多而意不足

智果善學書合處不減古人然時有僧氣可恨羊欣書
舉止羞澁蕭衍老翁亦善評書也

宋儋筆墨精勁但文詞蕪穢不足發其書子瞻嘗云其
人不解此狡獪書便不足觀至如儋書畫不可棄也

王僧虔書畫既佳論薦謝憲極有理

王侍中學鍾繇絕近真行皆妙如此書乃可臨學謝太
傅墨跡聞駙馬都尉李公焰有之不作姿媚態度恨不
見爾若但如此卷中帖去右軍父子間可著數人

衛中令闕音敬帖近世草書不復敢望其藩也此一章語亦佳

郗方回書初不減王氏父子誠不浪語

謝太傅所稱道民安蓋事五斗米道耶右軍為獻之女玉潤請罪亦稱民也

知足下故羸疾而冒暑遠涉而失一筆冒多一筆古帖或不可讀類皆如此

蔡公遂委篤又加瘳下日數十行觀此語初和父所論

疾證似是也當今人物耿然而難疾如此令人短氣今年每讀此語便復意寒足下時事少可數來主人相尋以下十一行語鄙字畫亦不韻非右軍簡札灼然不知那得濫吹阿堵中此卷中伯趙鳴而載陰爽鳩習而揚武與儻因行李願存故舊皆鄙語非右軍意書札亦相去遠甚

癰不即潰藥法書家疑非右軍余愛其自成一體其間有可恨或是傳摹失真爾

此字與東方朔畫贊相似而子瞻謂畫贊亦非右軍書
人間愛憎常自不合如退之柳子厚論鶡冠子可知也
昨遂不奉恨深帖有秦漢篆筆中令自言故應不同真
不虛耳中令書中有相勞苦語極佳讀之了不可解者
當是牋素敗逸字多爾觀其可讀者知其爾耳米芾元
章等治中令書皆呂意附會解說成理故似杜元凱春
秋癖耶

因夜行忽復下如欲作瘖古方少無此疾名膠東初虞

世和父云瘳讀為滯滯下若今人下利而更衣難者也
此卷中尤作妙墨右軍父子真行略相當相抗爾余嘗
評書云字中有筆如禪家句中有眼直須具此眼者乃
能知之

余嘗論近世三家書云王著如小僧縛律李建中如講
僧參禪楊凝式如散僧入聖當以右軍父子書為標準
觀予此言乃知其遠近

大令草法殊迫伯英淳古少可恨彌覺成就爾所以中

間論書者以右軍草入能品而大令草入神品也余嘗以右軍父子草書比之文章右軍似左氏大令似莊周也由晉以來難得脫然都無風塵氣似二王者惟顏魯公楊少師髣髴大令爾魯公書今人隨俗多尊尚之少師書口稱善而腹非也欲深曉楊氏書當如九方臯相馬遺其玄黃牝牡乃得之

題縫本法帖

心能轉腕手能轉筆書字便如人意古人工書無它異

但能用筆耳元豐八年夏五月戊申趙正夫出此書於平原官舍會觀者三人江南石庭簡嘉興柳子文豫章黃庭堅

自高宗以上皆有鍾王典刑當其妙處殆欲編之王家二令中書略無愧也

錢尚父書號稱當代入神品比高宗翰墨其中尚容十許人耳

余嘗評書字中有筆如禪家句中有眼至如右軍書如

涅槃經說伊字具三眼也此事要須人自體會得不可見立論便興諍也

王會稽初學書於衛夫人中年遂妙絕古今今人見衛夫人遺墨疑右軍不當北面蓋不知九萬里則風斯在下耳

右軍筆法如孟子言性莊周談自然從說橫說無不如意非復可以常理待之

右軍真行章草葉無不曲當其妙處往時書家置論以

為右軍真行皆入神品藁書乃入能品不知憑何便作此語政如今日士大夫論禪師某優某劣吾了不解古人言坐無孔子焉別顏回真知言者

王氏書法以為如錐畫沙如印印泥蓋言鋒藏筆中意在筆前耳承學之人更用蘭亭永字以開字中眼目能使學家多拘忌成一種俗氣要之右軍二言羣言之長也

王令翰墨了無俗氣平原塵土中夜開此書如臨深登

高脫棄轡絡魚鳥皆得人意妙處

謝太傅嘗問獻之卿書何如君家尊獻之曰固應不同論者多不為然彼欲與乃翁抗行大似不遜余嘗評其書右軍能父中令能子同時諸人皆不能在此位也

王中令人物高明風流弘暢不減謝安石筆札佳處濃纖剛柔皆與人意會貞觀書評大似不公去逸少不應如許遠也

伯英書小紙意氣極類章書精神照人此翰墨妙絕無

品者

鍾大理表章致佳世間益有數本肥瘠小大不同蓋後來善臨榻本耳要自皆有佳處兩晉士大夫類能書筆法皆成就右軍父子拔其萃耳觀魏晉間人論事皆語少而意密大都猶有古人風澤略可想見論人物要是韻勝為尤難得蓄書者能以韻觀之當得髣髴

宋齊間士大夫翰墨頗工合處便逼右軍父子蓋其流風遺俗未遠師友淵源與今日俗學不同耳

宋儋書姿媚尤宜於簡札惜不多見

王謝承家學字畫皆佳要是其人物不凡各有風味耳
觀王濛書想見其人秀整幾所謂毫髮無遺恨者王荆
公嘗自言學濛書世間有石刻南澗樓詩者似其苗裔
但不解古人所長乃爾難到

觀唐人斷紙餘墨皆有妙處故知翰墨之勝不獨在歐
虞褚薛也惟恃耳而疑目者蓋難與共談耳

張長史郎官廳壁記唐人貞書無能出其右者故草聖

度越諸家無轍迹可尋懷素見顏尚書道張長史書意
故獨入筆墨三昧

或傳顏公書得長史筆法僧懷素見公自矜得折釵股
筆顏公言折釵股何如屋漏法懷素起捉公手云老賊
盡之矣觀魯公乞米乞鹿脯帖與郭令書祭姪文皆當
與王中令鴈行耳懷素草莫年乃不減長史蓋張妙於
肥藏真妙於瘦此兩人者一代草書之冠冕也

書遺教經後

佛遺教經一卷不知何世何人書或曰右軍羲之書黃
庭堅曰吾嘗評此書在楷法中小不及樂毅論爾清勁
方重蓋度越蕭子雲數等頃見京口斷崖中瘞鶴銘大
字右軍書其勝處乃不可名貌以此觀之良非右軍筆
畫也若瘞鶴碑斷為右軍書端使人不疑如歐薛顏柳
數公書最為端勁然纔得瘞鶴銘髣髴爾唯魯公宋開
府碑瘦健清拔在四五間

跋佛頂呪

佛頂呪筆畫似鄭預洛祠志及般若心經注然此書自縛規矩不能略見筆妙正是經生絕藝爾觀書者當用此意求之

跋續法帖

往在館中時於閣下一觀李懷琳臨右軍絕交書大有奇特處今觀此十未得其二三以此言之十卷中大率皆如此又智永十八行判作右軍書蕭子雲臨索征西書便判作靖書此等難使鄭彰輩任其責劉無言箋題

便不類今人書使之春秋高江東又出一羊欣薄紹之
矣

題榮咨道家廟堂碑

今世有好書癖者榮咨道嘗以二十萬錢買虞永興孔
子廟堂碑予初不信以問榮則果然後求觀之乃是未
剗去大周字時墨本字猶有鋒鏑但墨紙有少腐敗處
耳

題張福夷家廟堂碑

頃見墨刻虞永興孔子廟碑甚不厭人意意亦疑石工
失真太遠今觀舊刻雖姿媚而造筆之勢甚道固知名
下無虛士也榮咨道嘗以二十萬錢買一碑即此碑舊
刻其中缺字亦略相類唯額書大周孔子廟堂之碑八
字為異耳又碑末長安三年太歲癸卯金四月壬辰水
朔八日己亥木書額相王書也又云朝議郎行左豹衛
長史直鳳閣鍾紹京奉相王教搨勒碑額雍州萬年縣
光宅鐫字又卷尾昔人題云咸通七年七月七日於二

十二姊處得龍兄來認今福夷無大費而甚愛之雖無前後數十字非寶藏是書之本意

題蔡致君家廟堂碑

頃年觀廟堂碑摹本竊怪虞永興名浮於實及見舊刻乃知永興得智永筆法為多又知蔡君謨真行簡札能入永興之室也元祐四年在中都初見榮輯子雍家一本紹聖元年在湖陰又見張威福夷家一本其十二月在陳留又見蔡寶臣致君家一本以石本未刊缺不以

摹本補綴則榮本第一張本第二蔡本第三亦嘗於它處見數本新舊雜揉所謂海圖折波濤舊繡移曲折天吳及紫鳳顛倒在裋褐者也然尚有典刑亦不可廢也
陳留淨土院書

題虞永興道場碑

草書妙處須學者自得然學久乃當知之墨池筆塚非傳者妄也虞永興常被中畫腹書末年尤妙貞觀間亦已老矣而是書之工唐人未有逮者元豐乙丑五月戊

申平原監郡趙正夫會食于西齋出以示余諦玩無數
題徐浩碑

唐自歐虞後能備八法者獨徐會稽與顏太師耳然會稽
多肉太師多骨而此書尤姿媚可愛時人快其書以
為如怒猊扶石渴驥奔泉余以為非是

題楊凝式詩碑

余嘗評近世三家書楊少師如散僧入聖李西臺如法
師參禪王著如小僧縛律恐來者不能易予此論也少

師此詩草余二十五年前嘗得之日臨數紙未嘗不難其妙

題楊凝式書

俗書喜作蘭亭面欲換凡骨無金丹誰知落地即命之下筆却到烏絲欄

跋張長史千字文

張長史書智雍廳壁記楷法妙天下故又作草如寺僧懷素草工瘦而長史草工肥瘦硬易作肥勁難得也

書張長史乾元帖後

察觀張長史與顏魯公論筆法嘗疑其用意處多觀乾元二年帖與琵琶詩乃知文不虛生皆有意化之方易足固天機動爾盧文紀叶清泰之下遂掌樞極初亦有所建明方事之勢乃能留意翰墨耶

跋張長史草書

張長史作草乃有超軼絕塵處以意想作之殊不能得其髣髴嘗作得兩句云清鑑風流歸賀八飛揚跋扈

付朱三未知可贈誰遂不能成章

題顏魯公帖

觀魯公此帖奇偉秀拔奄有漢魏晉隋唐以來風流氣
骨回視歐虞褚薛徐沈輩皆為法度所窘豈如魯公蕭
然出於繩墨之外而卒與之合哉蓋自二王後能臻書
法之極者惟張長史與魯公二人其後楊少師頗得髣
髴但少規矩復不善楷書然亦自冠絕天下後世矣

題顏魯公麻姑壇記

余嘗評題魯公書體制百變無不可人真行草書隸皆得右軍父子筆勢歐陽文忠公集古銘頗以別書自喜自非精鑒豈易辯真贋哉

跋顏魯公東西二林題名

余嘗評魯公書獨得右軍父子超軼絕塵處書家未必謂然惟翰林蘇公見許近觀郭忠恕序字源後云家君授以張顏筆法乃知人中常自有精鑒耳

書徐浩題經後

書家論徐會稽筆法怒猊抉石渴驥奔泉以余觀之誠
不虛語如季海筆少令韻勝則與稚恭並驅爭先可也
季海長處正是用筆勁正而心圓若有工不論韻則王
著優於季海季海不下子敬若論韻勝則右軍大令之
門誰不服膺往時觀怒猊抉石渴驥奔泉之論茫然不
知是何等語老年乃於季海書中見之如觀人眉目也
三折肱知為良醫誠然哉季海暮年乃更擺落王氏
規摹自成一家所謂盧蒲嫫其髮甚短而心甚長惜乎

當時君子莫能以短兵伐此老賊也前朝翰林侍書王著筆法圓勁今所藏樂毅論周興嗣千字文皆著書墨蹟此其長處不減季海所乏者韻爾

跋翟公巽所藏石刻

石鼓文筆法如圭璋特達非後人所能贗作熟觀此書可得正書行草法非老夫臆說蓋王右軍亦云爾

瘞鶴銘大字之祖也往有故一切導師之碑字可與之爭長今亡之矣

黃庭經王氏父子書皆不可復見小字殘缺者云是永禪師書既剝缺亦難辯真贗字差大者是吳通微書字形差長而瘦勁筆圓勝徐浩書也

周秦古器銘皆科斗文字其文章爾雅朝夕玩之可以披剝華偽自見至情雖戲弄翰墨不為無補

樂毅論舊石刻斷軼其半者字瘦勁無俗氣後有人復刻此斷石文摹傳失真多矣完書者是國初翰林侍書王著寫用筆圓熟亦不易得如富貴人家子非無福氣

但病在韻耳

遺教經譯於姚秦弘始四年在王右軍沒後數年弘始中雖有譯本不至江南至陳氏時有譯師出遺教經論於是稍行今長安雷氏家遺教經石上行書貞觀中行遺教經敕令擇善書經生書本頒焉敕與經字是一手但真行異耳余平生疑遺教非右軍比來攷尋遂決定知非右軍書矣

蔡明遠帖是魯公晚年書與邵伯瑀謝安石廟中題碑

傍字相類極力追之不能得其髣髴

魯公與郭令公書論魚軍容坐席凡七紙而長安安氏兄弟異財時以前四紙作一分後三紙及乞鹿脯帖作一分以故人間但傳至不願與軍容為佞柔之友而止元祐中余在京師始從安師文借得後三紙遂合為此書雖特奇猶不及祭濠州刺史文之妙蓋一紙半書而真行草法皆備也

魯公寒食問行期為病妻乞鹿脯舉家食粥數月從李

大夫乞米此三帖皆與王子敬可抗行也

魯公祭李明文文章字法皆能動人與夫人書迫切而有禮意與郭靈運書送劉太沖序余未之見也顏惟貞蘭陵夫人誥佳筆也

東方曼倩畫贊筆圓淨而勁肥瘦得中但字身差長蓋崔子玉字形如此前輩或隨時用一人筆法耳

張長史千字及蘇才翁所補皆怪逸可喜自成一家然號為長史者實非張公筆墨余中年來稍悟作草故知

非張公書後有人到余悟處乃當信耳

張長史行草帖多出於贗作人聞張顛未嘗見其筆墨
遂妄作狂蹶之書託之長史其實張公姿性顛逸其書
字字入法度中也楊次公家見長史真跡兩帖天下奇
書非世間隔簾聽琵琶之比也

柳公權謝紫絲鞞鞋帖筆勢往來如用鐵絲糾纏誠得
古人用筆意

道林嶽麓寺詩字勢豪逸真復奇崛所恨功巧太深耳

少令巧拙相半使子敬復生不過如此禁中板刻古法帖十卷當時皆用歙州貢墨墨本賜羣臣今都下用錢萬二千便可購得元祐中親賢宅從禁中借版墨百本分遺宮僚但用潘谷墨光輝有餘而不甚黟黑又多本橫裂紋士大夫不能盡別也此本可當舊板價之半耳陰符經出於唐李筌熟讀其文知非黃帝書也蓋欲其文奇古反詭譎不經蓋糅雜兵家語作此言又妄託子房孔明諸賢訓註尤可笑惜不經柳子厚一掇擊也

李翰林醉墨是葛八叔忱贗作以嘗其婦翁諸蘇果不能別蓋叔忱翰墨亦自度越諸賢可寶藏也

文章翫馘而得韓退之詩道敝而得杜子美篆籀如畫而得李陽冰皆千載人也陳留有王壽卿得陽冰筆意非章友直陳晞畢仲荀文勛所能管攝也

程公巽所藏古石刻甚富然有數種妙墨獨未入篋中何邪魯公東西林題名宋開府神道永州磨崖諸奇書楊少師洛中十一碑懷素自叙草書千餘字當集為一

它日可為跋尾禪家云法不孤起仗境方生懸想而書
不得一二又臂痛才能用筆三四分耳

跋王立之諸家書

昨見雍人安汾叟家所藏顏魯公書數卷祭濠州刺史
文與郭英又論魚開府坐席書祭兄子泉明文峽州別
駕與李勉太保書為病妻乞鹿脯帖乃知翰墨之美盡
在安氏藏古書於今為第一

余曩時至洛師遍觀僧壁間楊少師書無一字不造微

入妙此書蓋當與吳生畫為洛中二絕也

見顏魯公書則知歐虞褚薛未入右軍之室見楊少師書然後知徐沈有塵埃氣雖然此論不當察察言蓋能不以己域進退者寡矣

跋李後主書

觀江南李主手改表草筆力不減柳誠懸乃知今世石刻曾不得其髣髴余嘗見李主與徐鉉書數紙自論其文章筆法政如此但步驟太露精神不及此數字筆意

深穩蓋刻意與率爾為之工拙便相懸也

跋李伯時所藏篆戟文

龍眠道人於市人處得全銅戟漢制也泥金六字字家不能讀蟲書妙絕於今諸家未見此一種乃知唐玄度僧夢英皆妄作耳

跋洪駒父諸家書

唐太宗英睿不羣所學輒便過人計神堯初定四海太宗年二十許爾字畫已能如此所以末年詔敕有魏晉

之風亦是富貴後能不廢學爾崇寧元年閏月初六日當塗江口折柳亭中書

顏魯公書雖自成一家人然曲折求之皆合右軍父子筆法書家多不到此處故尊尚徐浩沈傳師爾九方臯得千里馬於沙丘衆相工猶笑之今之論書者多牡而驪者也

蔡明遠帖筆意縱橫無一點塵埃氣可使徐浩伏膺沈傳師北面

跋武德帖

武德中省曹符移字畫猶有鍾元常筆法蓋承周隋之
氣習全學元常爾如近世宋宣獻公書號為近古猶未
盡得此筆意也



山谷集卷二十八